



SLUŽBENE NOVINE

ZENIČKO - DOBOJSKOG KANTONA

Godina XII - Broj 6

ZENICA, Petak, 30.03.2007.

SKUPŠTINA

49.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 4. sjednici održanoj dana 14.03.2007. godine, donijela je:

ZAKON

o izmjenama i dopunama Zakona o kantonalnim ministarstvima i drugim tijelima kantonalne uprave

Član 1.

U članu 1. Zakona o Kantonalnim ministarstvima i drugim tijelima kantonalne uprave ("Službene novine Zeničko-dobojskog kantona", broj: 15/04) (u daljem tekstu: Zakon), riječ "ustanove" zamjenjuje se riječju "organizacije".

Iza stava 1. dodaje se stav 2. koji glasi:

"U svim ostalim glavama, poglavljima i članovima zakona, riječ "ustanove" zamjenjuje se riječju "organizacije" u odgovarajućem padežu".

Član 2.

U članu 4. iza riječi "ustanovama" dodaju se riječi (u daljem tekstu: tijela).

Iza stava 1. dodaju se stavovi 2. i 3. koji glase:

"Tijela iz stava 1. ovog člana odražavat će ravnopravnu zastupljenost spolova.

Sve imenice, koje se odnose na nazive rukovodioca kantonalnih organa uprave i kantonalnih upravnih organizacija, na državne službenike i namještenike sadržane u ovom zakonu samo u muškom rodu, odnose se na oba spola."

Član 3.

U članu 7. u stavu 2. tekst "...Kantonalnog zakona o upravi i drugih kantonalnih zakona koji se odnose na službenike i namještenike..." se briše.

Iza stava 2. dodaju se stavovi 3. i 4. koji glase:

"Ministarstvo za pravosuđe i upravu vrši poslove davanja mišljenja o usklađenosti zakona i drugih propisa koje donosi Skupština Kantona, Vlada Kantona i rukovodioci kantonalnih organa uprave sa Evropskom konvencijom o zaštiti ljudskih prava i osnovnih sloboda i drugim instrumentima za zaštitu ljudskih prava koji imaju snagu ustavnih odredaba i druge upravne poslove koji ne spadaju u djelokrug organa uprave Kantona.

Vlada Kantona će podzakonskim aktom utvrditi postupak davanja mišljenja Ministarstva na akte iz stava 3. ovog člana".

Član 4.

U članu 19. stav 1. iza tačke "1" dodaju se nove tačke "2. i 3., koje glase:

"2. Kantonalni zavod za pravnu pomoć

3. Kantonalni zavod za urbanizam i prostorno uređenje",

Iza stava 2. dodaju se stavovi 3., 4. 5. i 6. koji glase:

Kantonalni zavod za pravnu pomoć (u daljem tekstu: Zavod za pravnu pomoć) obavlja poslove davanja usluga isključivo osobama lošeg imovnog stanja u vidu davanja pravnih savjeta, sastavljanja različitih pravnih podnesaka (tužbe, molbe, zahtjevi, predstavke, prigovori, žalbe i dr.), sastavljanje raznih isprava (ugovori, testamenti i dr.), zastupanje stranaka u svim parničnim, upravnim i ostalim postupcima pred sudovima i ostalim organima Zeničko-dobojskog kantona, odbrana i zastupanje u kri-

vičnom postupku, pružanje i drugih oblika pravne pomoći fizičkim osobama kako bi se zaštitila njihova prava i interesi.

Ministar za pravosuđe i upravu donijet će Pravilnik kojim će se regulisati uslovi i načini pružanja besplatne pravne pomoći osobama lošeg imovnog stanja.

Kantonalni zavod za urbanizam i prostorno uređenje (u daljem tekstu: Zavod) obavlja poslove nosioca izrade razvojnih planova (prostornog, urbanog, ekonomskog i drugog razvoja), izrađuje i implementira strategiju razvoja Kantona, koordinira i učestvuje u pripremi i praćenju projekta obnove i razvoja Kantona, kao i promocija Kantona, osigurava naučne i druge podloge za ostvarivanje Ustavom utvrđenih nadležnosti Kantona iz oblasti prostornog uređenja, vrši poslove nosioca izrade provedbenih planova i pripremanja propisa koji su sastavni dio plana, obavlja poslove izrade smjernica i programa aktivnosti za izradu provedbenih planova, obavlja poslove stručno-tehničke pripreme za izradu godišnjeg programa za donošenje prostorne i urbanističke dokumentacije, učestvuje u pripremi propisa iz oblasti prostornog uređenja (zakona i podzakonskih akata), daje stručna mišljenja u postupku odobravanja građenja za potrebe općina sa područja Kantona, obavlja poslove izrade prostornih planova područja posebnih obilježja, te urbanističkih planova administrativnog centra, obavlja poslove izdavanja časopisa i periodičnih publikacija iz oblasti prostornog uređenja i urbanizma, vrši poslove površinskog i dubinskog ispitivanja terena za gradnju, obavlja poslove savjetovanja i ponude programske opreme (softvere), vrši poslove upravljanja bazama podataka, obavlja poslove arhitektonske i inženjerske djelatnosti i tehničko savjetovanje, uređuje ostala pitanja vezana za prostorno uređenje i urbanizam.

Zavod ima status pravne osobe.

Član 5.

U članu 25. stav 2. mijenja se i glasi:

„Pravilnik o unutrašnjoj organizaciji izrađuje se i donosi na način utvrđen Zakonom o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05) i drugim propisima koji se odnose na izradu i donošenje pravilnika“.

Član 6.

Član 25 a. briše se.

Član 7.

Stupanjem na snagu ovog zakona, prestaje da važi Zakon o kantonalnom zavodu za pravnu pomoć („Službene novine Zeničko-dobojskog kantona“, broj: 5/05) i Zakon o osnivanju Kantonalnog zavoda za urbanizam i prostorno uređenje („Službene novine Zeničko-dobojskog kantona“, broj: 8/05).

Član 8.

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-6068/07

PREDSJEDAVAJUĆI

Zenica, 15.03.2007. godine

Sejad Zaimović, s.r.

50.

Na osnovu člana 103. Poslovnika Skupštine Zeničko-dobojskog kantona («Službene novine Zeničko-dobojskog kantona», broj 4/05), Skupština Zeničko-dobojskog kantona, na 4. sjednici, održanoj 14.03.2007. godine, donijela je:

DEKLARACIJU

I

Skupština Zeničko-dobojskog kantona izražava nezadovoljstvo zbog sporosti u reformi fiskalnog sistema Federacije Bosne i Hercegovine, naročito u domenu direktnih poreza.

II

Skupština Zeničko-dobojskog kantona traži od nadležnih organa Federacije Bosne i Hercegovine i države Bosne i Hercegovine hitno pokretanje procesa ujednačavanja osnovnih uslova za poslovanje privrednih subjekata na cjelokupnoj teritoriji Bosne i Hercegovine.

III

Skupština Zeničko-dobojskog kantona će poduzeti sve neophodne akcije iz svoje nadležnosti kako bi Zeničko-dobojski kanton učinila najpoželjnijom regijom za pokretanje i vođenje biznisa.

IV

Deklaracija će biti objavljena u «Službenim novinama Zeničko-dobojskog kantona».

Broj: 01-14-6075/07

Datum, 15.03.2007. godine **PREDSJEDAVAJUĆI**
Zenica *Sejad Zaimović, s.r.*

51.

Na osnovu člana 1.10 stav 1. tačka 1. Izbornog zakona Bosne i Hercegovine («Službeni glasnik BiH», broj: 23/01, 7/02, 9/02, 20/02, Ispravka 25/02, 4/04, 20/04, 25/05, 52/05, Ispravka 65/05, 77/05, 11/06 i 24/06), Skupština Zeničko-dobojskog kantona na 4. sjednici održanoj 14.03.2007. godine, donijela je:

O D L U K U

o prestanku mandata poslanika

Član 1.

Mandra Nerminu, prestaje mandat poslanika sa 16.02.2007. godine, zbog podnošenja ostavke.

Član 2.

Odluka stupa na snagu danom donošenja i objavit će se u «Službenim novinama Zeničko-dobojskog kantona».

Broj: 01-01-6074/07

Datum, 15.03.2007. godine **PREDSJEDAVAJUĆI**
Zenica *Sejad Zaimović, s.r.*

VLADA

52.

Na osnovu člana 16. stav 2. Zakona o Vladi Zeničko-dobojskog kantona („Službene novine Zeničko-dobojskog kantona“, broj: 16/00, 7/05 i 4/06), Vlada Zeničko-dobojskog kantona, na 1. sjednici održanoj 26.02.2007. godine, donosi

O D L U K U

o određivanju potpisnika naloga platnih transakcija putem depozitnog i transakcijskog računa otvorenog kod IKB D.D. Zenica

Član 1.

Vlada Zeničko-dobojskog kantona za potpisnike naloga platnih transakcija putem depozitnog i transakcijskog računa otvorenog kod IKB D.D. Zenica, određuje:

1. **Miralema Galijaševića**, premijera Zeničko-dobojskog kantona
2. **Mirsada Šaranovića**, ministra Ministarstva finansija
3. **Nermina Mandru**, ministra Ministarstva za prostorno uređenje, promet i komunikacije i zaštitu okoline.

Član 2.

Za zamjenike potpisnika naloga platnih transakcija putem depozitnog i transakcijskog računa iz člana 1. ove odluke, određuju se:

1. **Fahrudin Omerhodžić**, ministar Ministarstva za privredu,
2. **Nada Delibašić**, pomoćnik ministra za Trezor u Ministarstvu finansija.

Član 3.

Donošenjem ove odluke stavlja se van snage Odluka o potpisnicima naloga platnih transakcija putem depozitnog i transakcijskog računa otvorenog kod IKB DD Zenica („Službene novine Zeničko-dobojskog kantona“, broj 2/06).

Član 4.

Ova odluka stupa na snagu danom donošenja i bit će objavljena u „Službenim novinama Zeničko-dobojskog kantona“.

Broj: 02-14-5781/07

Datum, 26.02.2007. godine **PREMIJER**
Zenica *Miralem Galijašević, s.r.*

OGLASNI DIO**OPĆINSKI SUD U ZAVIDOVIĆIMA****Broj: P-303/99-Z****Zavidovići, 19.03.2007. godine**

Općinski sud u Zavidovićima, sudija **Muhić Hava**, u pravnoj stvari tužitelja Općina Zavidovići, koju zastupa Općinski pravobranilac Fazlić Dženana, protiv tuženih: 1. Neimarlija Fahrije iz Zavidovića, ul. Zlatnih ljiljana bb, trenutno nepoznatog boravišta i 2. TD „Centar“ d.d. Zavidovići, koga zastupa Mustafić Tifa, zaposlenica tuženog, radi utvrđivanja ništavosti ugovora v.s. 15.000,00 KM, donio je dana 19.03.2007. godine, slijedeće:

R J E Š E N J E

Tuženom **Neimarlija Fahriji**, nepoznatog boravišta postavlja se za privremenog zastupnika advokat **Kalabić Uzeiz** iz Zavidovića.

Privremeni zastupnik će zastupati tuženog u postupku sve dok se tuženi ili negov punomoćnik ne pojave pred sudom. Odnosno dok organ starateljstva ne obavijesti sud.

O b r a z l o ž e n j e

Tužitelj je ovom sudu dana 20.8.1999. godine podnio tužbu protiv tuženog, radi utvrđivanja ništavosti ugovora.

Postupajući po tužbi, sud je tuženom Neimarlija Fahriji dostavio tužbu na odgovor, a na dostavnici je konstatovao da tužba nije uručena, jer se tuženi nalazi u Francuskoj.

Kako je boravište tuženog nepoznato, a postupak oko postavljanja zakonskog zastupnika trajao bi dugo, tako da bi mogle nastati štete i posljedice za tužitelja, sud je na prijedlog zastupnice tužitelja, tuženom Neimarlija Fahriji, shodno odredbi čl. 296 st. 2 točka 4 u vezi sa čl. 297. FBiH donio rješenje kao u dispozitivu.

Sudija
Muhić Hava, s.r.

Sadržaj**SKUPŠTINA**

49. Zakon o izmjenama i dopunama Zakona o kantonalnim ministarstvima i drugim tijelima kantonalne uprave	63
50. Deklaracija broj:01-14-6075/07 od 15.03.2007. godine.....	64
51. Odluka o prestanku mandata zastupnika	65

VLADA

52. Odluka o određivanju potpisnika naloga platnih transakcija putem depozitnog i transakcijskog računa otvorenog kod IKB D.D. Zenica.....	65
--	----

OGLASNI DIO.....	66
-------------------------	-----------

Izdavač: Zeničko-dobojski kanton, ul. Kučukovići br. 2, Zenica
v.d. glavni i odgovorni urednik: Željka Marković - Sekulić, **Telefon:** 032/444-820;
Redakcija i pretplata: 032/407-424; **Tisak:** "Meligraf" Zenica